

E homber jamá Betico

Nos tur na Aruba ta celebra su dia, pero ken tabata Betico Croes? Ta 24 año caba cu el a muri, pero keto bai nos ta keda cord'é pa tur loke el a haci pa nos isla. Ban bek den tempo pa nos conta ta ken ta Betico y kiko el a significa pa Aruba.

Su nomber berdadero ta Gilberto François Croes, pero un y tur cu conoce ta jam'é Betico. El a nace dia 25 di januari (p'esey Dia di Betico ta ser celebra riba e fecha aki tur año), na año 1938, na Santa Cruz. Despues di a caba scol aki na Aruba, el a bai Hulanda pa sigui studia. Na año 1959 el a bolbe Aruba y a bai traha como meneer di scol, prome na Colegio San Hose, y despues na Sint Antonius College.

Na año 1967 el a wordo acerca pa drenta politica, y a subi e lista di partido AVP. El a bira diputado e tempo ey tambe di Enseñansa. Despues di 4 año cu AVP, el a funda su mesun partido, MEP. E mesun año ey, pues 1971, e tabata forma parti di un Comision di Reino cu tabata lucha pa Aruba haya su status aparte. Status Aparte kiermen: Separa nos mes for di Antiyas, pa nos mes como Arubiano goberna riba Aruba. E tempo ey hopi ta esnan cu tabata tin e mesun deseo aki cu Betico. Nan tabata cansá cu semper tur loke ta concerní asuntonan di Aruba mester a wordo dicidí na Curaçao, unda e gobierno tabata sintá.

Pero Hulanda no tabata kier a duna Aruba su Status Aparte na principio. E comision a dicidi e ora ey pa no solamente insisti riba e Status Aparte, pero pa Aruba su independencia tambe, pues no solamente pa ta los for di Antiyas, pero los for di Hulanda tambe.

Den tur e temponan aki di bai-bin Hulanda y Antiyas, tabata tin hopi manifestacionnan rond Aruba mes, y Betico semper tabata scucha e deseo di mas grandi di e Arubianonan, esta LIBERTAD. Durante un di a manifestacionnan aki, Betico a wordo heridá cu un bala cu a ser dispará pa un polis na veld di Winston. Pero danki Dios cu el a recupera di esaki, y e lucha por a sigui su caminda.

Dia 25 di Maart 1977 tabata tin un referendum (unda e pueblo di Aruba a vota pa sea sali for di Antiyas of keda aden). E resultado tabata cu 82% di e hendenan cu a vota a pidi pa Status Aparte. Pero asina mes gobierno di Antiyas no tabata tin oido pa e deseo aki. Na juni di e mesun año den eleccionnan tení aki na Aruba, MEP a haya mayoria di voto (5 asiento den gobierno). Pero na di dos lugar tabata PPA cu a haya 3 asiento. Gobierno Central (e gobierno di Antiyas) a dicidi di pone e ora ey PPA den gobierno y no MEP. Como cu esaki no tabata husto, e pueblo di Aruba a rabia mas ainda cu Curaçao, y un manifestacion mas grandi ainda a ser teni dia 11 di augustus, y no pa djies un rato so, sino esaki a dura full un siman! Tabata tin hopi rabiamento, mas ainda pasobra ni Curaçao ni Hulanda tabata haci algo. Betico tabata tur e dianan aki entre e hendenan y purbando di papia cu ambos banda, esta e pueblo y gobernantenan pa por trece un solucion pa e problema.

Aruba tabata "plat", pues niun hende tabata traha, ni doñonan di trabao, ni nan empleadonan, etc. Aeropuerto

tambe tabata bashi. Tampoco tabata tin coriente! Polisnan na Aruba tabata prepara pa cualkier cos cu por a bai for di man, y ora cu for di den e multitud di hende rabiá a cuminsa tira botter, polisnan na nan beurt a cuminsa los tiro. Tabata tin algun herido, y por a mira balanan pegá den e murayanan di e edificio di gobierno y den algun auto cu a parkeer eybando, un di e autonan aki perteneciendo na Betico. Polisnan a listra varios cas tambe den e dianan ey, pa mira si tin arma. Y e cas di Betico y esun di su mayornan tambe a wordo listrá.

Dia 18 di Augustus porfin Hulanda a duna oido na e pueblo y e prome minister di Hulanda, den Uyl, a dicidi di reuni cu e delegacion di Aruba, encabesá pa Betico, y e grupo di Antiyas. Na año 1979 a instalá e Koninkrijks werkgroep, cual trabao tabata pa traha riba e proceso di independisacion di Aruba.

Na juli 1985 ta anuncia oficialmente cu Aruba lo haya su

Betico ta papiando aki cu e multitud di hende cu a bin manifesta dilanti di oficianan di gobierno.



Status Aparte dia 1 di januari 1986, y cu e independencia lo ta 10 año despues, pues 1 di januari 1996.

Ta lastima cu despues di tur e lucha, Betico mes no tabata t'ey pa mira e resultado di su trabao. Tabata 31 di december 1985 ora cu Betico ta wordo seriamente heridá den un desgracia cu auto. El a keda den coma pa 11 luna. Dia 26 di november 1986 Betico ta bai laga nos, pero sigurando nos nos libertad for di Antiyas.

Flor di Libertad

*Ki bal un homber sin derecho
Ki bal un homber sin bandera
Ki bal tin curason den pecho
Si bo no ta liber den bo tera.*

*Dios laga cu dia cu mi muri
Aruba por ta su mes doño
Y su bandera Flor di Libertad
lo dorna e lugar di mi eterno soño.*

Betico Croes



CHABALITO ta gradici colaboracion di sra. Gloria Croes di Fundacion Betico Croes